

CONVENIO DE COLABORACIÓN ENTRE A CONSELLERÍA DE CULTURA, LINGUA E XUVENTUDE, O CABIDO DO CONXUNTO CATEDRALICIO DE SANTIAGO DE COMPOSTELA E A FUNDACIÓN CATEDRAL DE SANTIAGO PARA A EXECUCIÓN DAS OBRAS DE CONSERVACIÓN E POSTA EN VALOR DA CAPELA DO CRISTO DE BURGOS DA CATEDRAL DE SANTIAGO DE COMPOSTELA: FASE 4 (FACHADAS DA CAPELA AO PATIO DE XELMÍREZ) E RESTAURACIÓN DO SEU INTERIOR.

Santiago de Compostela, 6 de maio de 2024.

REUNIDOS

Dunha parte,

José López Campos, que actúa en representación da Consellería de Cultura, Lingua e Xuventude en virtude do seu cargo de conselleiro para o que foi nomeado polo Decreto 60/2022, do 15 de maio de 2022, en exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa Presidencia, así como o artigo 7 da Lei 9/2007, do 13 de xuño, de subvencións de Galicia.

Doutra,

José Fernández Lago, con número de DNI , na súa condición de Deán da Catedral de Santiago nomeado por decreto do Arcebispo de Santiago de Compostela de 27 de febreiro de 2021.

E doutra,

Daniel Carlos Lorenzo Santos, co número de DNI e enderezo a efectos de notificacións na Rúa do Vilar nº 1, 1º dereita de Santiago de Compostela, na súa calidade de Director Xeral da Fundación Catedral de Santiago de Compostela, segundo o nomeamento efectuado polo Padroado da Fundación na xuntanza de data do 15 de abril de 2011 e a ampliación de facultades outorgada mediante acordo do Padroado adoptado en xuntanza de data 16 de maio de 2011.

Todas as partes teñen capacidade legal suficiente para outorgar o presente convenio de colaboración e, para tal efecto,

EXPOÑEN

I. Que a Xunta de Galicia asume a xestión das funcións sobre o patrimonio cultural en virtude do Real decreto 2434/1982, do 24 de xullo, sobre traspaso de funcións do Estado á Comunidade Autónoma de Galicia en materia de cultura, de acordo co

establecido no artigo 27.18 do Estatuto de Autonomía, en consonancia co estipulado no artigo 148.1.16 da Constitución Española, ámbito desenvolvido na Lei 5/2016, do 4 de maio, do patrimonio cultural de Galicia. Como indica o seu artigo 1: “o patrimonio cultural de Galicia está constituído polos bens mobles, inmobles ou manifestacións inmateriais que, polo seu valor artístico, histórico, arquitectónico, arqueolóxico, paleontolóxico, etnolóxico, antropolóxico, industrial, científico e técnico, documental ou bibliográfico, poidan ser considerados como de interese para a permanencia, recoñecemento e identidade da cultura galega a través do tempo”.

A Lei 5/2016, do 4 de maio, declara expresamente que ten por obxecto a protección, conservación, acrecentamento, difusión e fomento do patrimonio cultural de Galicia, de forma que lle sirva á cidadanía como unha ferramenta de cohesión social, desenvolvemento sustentable e fundamento da identidade cultural do pobo galego, así como a súa investigación, valorización e transmisión ás xeracións futuras.

A presente lei regula no seu título II o réxime de protección e conservación do patrimonio cultural de Galicia. No capítulo primeiro do citado título (artigo 33) establécese que “a Xunta de Galicia fomentará medidas e actuacións dirixidas a garantir a protección do patrimonio cultural de Galicia”, sen prexuízo do disposto no artigo 32 da presente lei. Asemade, o 17-04-1985, a Xunta de Galicia e as dioceses da Comunidade Autónoma de Galicia asinaron un convenio de colaboración co fin de garantir a conservación e promover o enriquecemento do patrimonio histórico, artístico e documental da Igrexa en Galicia. Ante isto, é necesario instrumentalizar a necesaria colaboración para a realización de actuacións que se levarán a cabo durante o ano 2024, no terreo da protección, da conservación e da rehabilitación dos inmobles de propiedade eclesiástica que forman parte do patrimonio cultural de Galicia.

A Santa Apostólica y Metropolitana Igrexa Catedral de Santiago de Compostela (en adiante SAMI), representada polo seu Cabido Catedralicio, é un singular monumento, que posúe valores históricos, artísticos e culturais de alto interese que a converten nun fito único no marco do patrimonio cultural europeo e que viu recoñecida a súa importancia e valía ao formar parte singular de dous bens incorporados á lista do Patrimonio Mundial pola UNESCO: a Cidade Vella de Santiago de Compostela, da que constitúe o seu principal monumento e o Camiño de Santiago, do que é meta e obxectivo final da peregrinación.

O Camiño de Santiago constitúe dende o punto de vista cultural un dos elementos máis destacados do patrimonio español, europeo e mundial que encontra a súa fundamentación histórica na tradición que sitúa ao final deste camiño a tumba do Apóstolo Santiago no edículo que deu orixe ao nacemento da catedral compostelá. Interese e valor cul-

tural que transcende o meramente relixioso, pois fundamenta e axuda a construír o concepto cultural europeo, xa que durante séculos foi un eixe fundamental de comunicación e integración entre os países do norte e centro de Europa e o noroeste da Península Ibérica, converténdose nun espazo de intercambio cultural e no primeiro itinerario cultural europeo.

O Camiño Francés e o Camiño do Norte, coas súas diferentes rutas, forman xunto co resto das principais rutas recoñecidas como son: o Camiño Inglés, o Camiño de Fisterra e Muxía, o Camiño Portugués, interior e da costa, a Vía da Prata ou Camiño Mozárabe e o Camiño de Inverno, todas elas consideradas bens culturais integrantes do Catálogo do Patrimonio Cultural de Galicia forman o conxunto dos Camiños de Santiago, territorio histórico que caracteriza e soporta a manifestación cultural e relixiosa da peregrinación a Santiago de Compostela e o fenómeno cultural Xacobeo.

A Catedral de Santiago de Compostela é un senlleiro monumento do patrimonio cultural de Galicia, cumio da arte e arquitectura románica, que representa e materializa a meta e o destino final dos camiños de Santiago e polo tanto de centos de miles de peregrinos que, co desexo de chegar a ela, percorren as rotas de peregrinación xacobeas que desde calquera parte do mundo rematan en Compostela, nas portas da súa catedral. Características que fan desta un elemento único non so do patrimonio cultural galego senón do patrimonio universal.

A Catedral de Santiago de Compostela foi declarada monumento histórico pola Lei do 22 de agosto de 1896 e que na actualidade ten a consideración de ben de interese cultural conforme a disposición adicional primeira da Lei 16/1985, do 25 de xuño, do patrimonio histórico español e a disposición adicional primeira da Lei 5/2016, do 4 de maio, do patrimonio cultural de Galicia.

Ademais o BIC Catedral de Santiago forma parte principal e destacada de dous bens incluídos na Lista do Patrimonio Mundial da UNESCO: a cidade vella de Santiago de Compostela e o Camiño Francés a Santiago de Compostela, recentemente ampliado polas dúas rutas do camiño do Norte recoñecidas pola UNESCO a ruta da costa e a do interior ou Camiño de Oviedo.

Que a Consellería de Cultura, Lingua e Xuventude é o órgano da Administración da Comunidade Autónoma a quen lle corresponden, entre outras, as competencias e funcións en materia de promoción da cultura e dos aspectos vinculados á protección, conservación, difusión, fomento e recuperación do patrimonio cultural de Galicia e dos

Camiños de Santiago, así como a elaboración dos anteprojectos normativos que lles afecten.

II. Que a Santa Apostólica y Metropolitana Igrexa Catedral de Santiago de Compostela (en adiante S.A.M.I.), aquí representada polo Cabido Catedralicio, é un singular monumento, que posúe valores históricos, artísticos e culturais de alto interese que a converten nun fito único no marco do patrimonio cultural europeo e que viu recoñecida a súa importancia e valía ao formar parte singular de dous bens incorporados á lista do Patrimonio Mundial pola UNESCO: a Cidade Vella de Santiago de Compostela, da que constitúe o seu principal monumento e o Camiño de Santiago, do que é meta e obxectivo final da peregrinación.

III. Que a Fundación Catedral de Santiago é unha fundación de carácter privado constituída o 23 de xullo de 2008 e inscrita no Rexistro de Fundacións de Interese Galego co número 2008/17, que conta entre os seus fins coa promoción, fomento e difusión da Catedral de Santiago de Compostela, do seu ámbito e do seu patrimonio artístico e cultural; así como a xestión e explotación, para os efectos da súa posta en valor, das infraestruturas da Catedral compostelá, do seu ámbito e do seu patrimonio artístico e cultural.

Que lle corresponde á Fundación Catedral, en virtude da encomenda de data 5 de setembro de 2015 realizada polo Cabido da S.A.M.I. Catedral de Santiago, a execución das actuacións que se contemplan no Plan Director do Conxunto Catedralicio aprobado por resolución da Dirección Xeral de Patrimonio Cultural do 9 de marzo de 2009, incluíndose a xestión e contratación de todas as obras que se realicen consonte o mesmo.

A Catedral de Santiago de Compostela conta dende o ano 2009 cun Plan Director do Conxunto Catedralicio aprobado por resolución da Dirección Xeral de Patrimonio Cultural do 9 de marzo de 2009. Este documento prevé e desenvolve un programa de actuacións dirixidas á conservación, restauración e posta en valor do conxunto catedralicio.

O Plan Director do Conxunto Catedralicio inclúe un plan de actuacións programadas e un listado de estudos complementarios que é necesario desenvolver e executar para garantir a correcta e necesaria conservación das fábricas do monumento, a funcionalidade e significación dos seus espazos, os usos culturais que alberga e a súa posta en valor para garantir a súa axeitada preservación e transmisión ás xeracións vindeiras. As actuacións propostas no devandito Plan Director clasificábanse como actuacións prioritarias, secundarias e de remate.

Dende o ano 2009, o Cabido Catedralicio e a Fundación Catedral de Santiago, a Xunta de Galicia, a Administración Xeral do Estado e o Consorcio de Santiago veñen promovendo e desenvolvendo un programa dirixido a atender e realizar as actuacións máis necesarias e urxentes daquelas que se prevían no documento do Plan Director, tendo alcanzado neste momento un alto grado de execución que alcanza principalmente ás naves maior e do cruceiro e á cabeceira da catedral, así como ás súas fachadas occidental, oriental e norte.

Este alto grado de desenvolvemento dos traballos de conservación e restauración do conxunto catedralicio, a pesar dos importantes investimentos realizados, non ten alcanzado á totalidade de paramentos, ámbitos e capelas do conxunto catedralicio. Entre aquelas que precisan dunha intervención de conservación axeitada, conforme as previsións do Plan Director, atópase a capela do Cristo de Burgos que está acaroada á fachada norte da nave maior ocupando o espazo que separa a catedral do pazo episcopal.

Nesta capela, recoñecible de forma singular, xa se ten actuado nas campañas anteriormente realizadas corrixindo aqueles efectos e axentes de deterioración máis graves, principalmente actuouse na renovación, na restauración e conservación dos sistemas construtivos máis afectados e con maior contacto coa nave maior catedralicia.

É necesario continuar co programa de restauración do conxunto catedralicio e desta capela en concreto, actuando agora nas fachadas que dan ao patio de Xelmírez e no interior da capela. Unha intervención necesaria que, sen chegar a completar a recuperación integral deste elemento, vai permitir avanzar para conseguir este obxectivo.

A intervención proposta no PBE para a conservación e posta en valor das fachadas da capela do Cristo de Burgos ao patio de Xelmírez afecta a áreas distintas:

- Paramentos exteriores da capela e das súas sancristías.
- Cuberta do corpo situado entre a capela e a sancristía oeste.
- Cuberta da capela dos túmulos (antiga adega).
- Patio entre a sancristía oeste e a torre da Carraca.
- Contrafortes e basamento entre contrafortes no Pazo de Xelmírez.
- Terraza cuberta dos canzorros (corpo de acceso á capela da Comuñón).

Os principais traballos a realizar serán a limpeza e restauración das fachadas leste e oeste da capela (accesibles dende a cuberta das sancristías e a adega); a instalación dos perfís nos lucernarios e a limpeza e o hidrofugado da cuberta de pedra de gra. No

caso da sancristía oeste, hidrofugarase o primeiro metro de muro oeste que fai de fachada co pequeno patio que se atopa entre a sancristía oeste e a catedral e executárase a restauración deste espazo.

Inclúense os traballos arqueolóxicos a realizar nun pequeno patio existente entre a sancristía oeste e a torre da catedral; a rehabilitación das cubertas (cuberta entre a sancristía oeste e a capela do Cristo de Burgos e na cuberta da capela dos túmulos; os traballos de limpeza e restauración dos muros exteriores da capela (incluíndo os tres escudos existentes no exterior), da sancristía leste e da sancristía oeste; traballos de carpintería e reixería: mellora dos lucernarios capela dos túmulos, reposición de carpinterías de madeira dos ocos das ventás, restauración e rearmado de portas de madeira e restauración de reixas.

Tamén se propón a restauración dos escudos e reixas exteriores desenvolvendo para isto un proxecto específico de conservación e restauración.

A intervención proposta no Proxecto de restauración do interior da capela do Cristo de Burgos inclúe a restauración de paramentos, bóvedas e solados do interior da capela desenvolvendo as unidades de obra recollidas no proxecto de Restauración da capela do Cristo de Burgos e da fachada ao patio de Xelmírez que para a restauración integral da capela se redactou no marco das Actuacións de conservación e restauración no Conxunto Catedralicio de Santiago de Compostela do ano 2017.

A Fundación Catedral de Santiago encargoulle a redacción dos dous proxectos ao arquitecto José Ignacio López de Rego Uriarte onde se definen de xeito pormenorizado o estado actual de conservación da capela e as tarefas e metodoloxías propostas na intervención. Para a autorización por parte da DXPC, a Fundación Catedral de Santiago achegará as propostas técnicas das intervencións polo miúdo.

O convenio terá por finalidade xeral garantir a adecuada conservación do Conxunto Catedralicio de Santiago de Compostela co fin de manter e promover a súa funcionalidade e significación relixiosa e cultural e poñer en valor, impulsar e acrecentar a súa función cultural e manter e desenvolver, de forma sostible, os recursos e potencialidades que posúen os valores culturais do monumento.

Ademais o BIC Catedral de Santiago forma parte principal e destacada de dous bens incluídos na Lista do Patrimonio Mundial da UNESCO: a cidade vella de Santiago de Compostela e o Camiño Francés a Santiago de Compostela, recentemente ampliado polas dúas rutas do camiño do Norte recoñecidas pola UNESCO a ruta da costa e a do interior ou Camiño de Oviedo.

En virtude do exposto, a Consellería de Cultura, Lingua e Xuventude, o Cabido Catedralicio e a Fundación Catedral de Santiago, teñen a vontade de establecer o marco da colaboración precisa para a xestión e execución das obras de conservación e restauración sinaladas e derivadas do Plan Director do Conxunto Catedralicio de Santiago de Compostela que se sinalan neste instrumento, polo que, considerando a sintonía de obxectivos, conveñen asinar o presente convenio de colaboración de acordo coas seguintes

CLÁUSULAS

Primeira: obxecto e finalidade do convenio.

Este convenio ten por obxecto establecer as bases de colaboración entre a Consellería de Cultura, Lingua e Xuventude, a S.A.M.I. Catedral de Santiago de Compostela, representada polo Cabido catedralicio e a Fundación Catedral de Santiago, para o financiamento das Obras de conservación e posta en valor da capela do Cristo de Burgos da Catedral de Santiago de Compostela: fase 4 (fachadas da capela ao patio de Xelmírez) e restauración do seu interior.

Por outra banda, esta intervención está incluída no Plan estratéxico para a protección e conservación do patrimonio cultural de Galicia da Dirección Xeral do Patrimonio Cultural, dentro das medidas Conservación das catedrais galegas e conservación e posta en valor dos Camiños de Santiago, do obxectivo operativo Conservar o patrimonio cultural galego.

O convenio ten por finalidade xeral garantir a adecuada conservación do Conxunto Catedralicio de Santiago de Compostela co fin de manter e promover a súa funcionalidade e significación relixiosa e cultural e poñer en valor, impulsar e acrecentar a súa función cultural e manter e desenvolver, de forma sostible, os recursos e potencialidades que posúen os valores culturais do monumento.

O beneficiario final da subvención é a S.A.M.I. Catedral de Santiago, representada polo Cabido Catedralicio. A Fundación Catedral de Santiago, como beneficiaria medial da mesma, xestionará a execución das actuacións de conservación e restauración do Plan Director por encargo da Catedral e percibirá os fondos re xestionará os mesmos por encargo da Consellería de Cultura, Lingua e Xuventude.

Porén tamén o é, indirectamente, o patrimonio cultural común das galegas e dos galegos e por extensión de toda a Humanidade ao atender directamente as necesidades de conservación dun monumento que forma parte senlleira do patrimonio galego, por suposto, mais tamén do patrimonio mundial.

Segunda: achega económica.

No estado de gastos da Lei de orzamentos da Comunidade Autónoma para o ano 2024, está incluída unha subvención nominativa a favor da Fundación Catedral de Santiago de Compostela, con cargo á devandita aplicación orzamentaria 10.05.433A.781.15 (CP 2015 00695) dos orzamentos xerais da Comunidade Autónoma, cunha achega económica máxima de 350.000,00 €, IVE incluído, na anualidade de 2024, que ten como denominación: Convenio Xunta de Galicia – Fundación Catedral de Santiago.

As actuacións a desenvolver ao abeiro do presente convenio serán as derivadas do seguinte proxecto de conservación:

PBE para a conservación e posta en valor das fachadas da capela do Cristo de Burgos ao patio de Xelmírez da Catedral de Santiago de Compostela.

Importe estimado: 208.752,83 €

Proxecto de restauración do interior da capela do Cristo de Burgos.

Importe estimado: 141.247,17 €

O importe da subvención máxima para a execución destas intervencións é de **350.000,00 €** que será financiada con cargo á **aplicación 10.05.433A.781.15, código de proxecto 2015 00695** dos Orzamentos da Xunta de Galicia para o ano 2024, coa seguinte desagregación:

Tipoloxía actuación	Tipoloxía de gasto/gastos subvencionables	Importe ano 2024	TOTAL
Restauración interior Capela do Cristo	Presuposto execución material (PEM)	98.095,12 €	141.247,17 €
	13% gastos xerais	12.752,37 €	
	6% beneficio industrial	5.885,71 €	
	Presuposto execución (PEM+GX+BI)	116.733,20 €	
	21% IVE	24.513,97 €	
	TOTAL	141.247,17 €	
PBE fachadas Capela do Cristo	Presuposto execución material (PEM)	144.977,31 €	208.752,83 €
	13% gastos xerais	18.847,05 €	
	6% beneficio industrial	8.698,64 €	
	Presuposto execución	172.523,00 €	

	(PEM+GX+BI)		
	21% IVE	36.229,83 €	
	TOTAL	208.752,83 €	
	TOTAL CONVENIO	350.000,00 €	350.000,00 €

No estado de gastos da Lei de orzamentos da Comunidade Autónoma para o ano 2024, está incluída unha subvención nominativa a favor da Fundación Catedral de Santiago de Compostela, con cargo á devandita aplicación orzamentaria 10.05.433A.781.15 (CP 2015 00695) dos orzamentos xerais da Comunidade Autónoma, cunha achega económica máxima de 350.000,00 €, IVE incluído, na anualidade de 2024, que ten como denominación: Convenio Xunta de Galicia – Fundación Catedral de Santiago.

Este importe máximo da subvención inclúe o custo do presuposto de contrata das obras calculado a partir do presuposto de execución material das mesmas, incrementado polos seguintes coeficientes de gastos considerados como máximos: 13% de gastos xerais e 6% de beneficio industrial e o 21% correspondente ao IVE segundo o tipo impositivo vixente e a previsión dun posible incremento pola liquidación das obras realmente executadas como resultado da súa medición final. En calquera caso, a achega máxima da Consellería de Cultura, Lingua e Xuventude, será de **350.000,00 €**, sendo a cargo do beneficiario calquera importe que supere a cantidade citada.

En todo caso considéranse gastos subvencionables os gastos especificados no artigo 29 da Lei de Subvencións de Galicia, que respondan de xeito indubidable á natureza da actividade subvencionada e se realicen no período de vixencia do convenio.

Será compatible a percepción doutras axudas para o mesmo proxecto sempre que, illada ou en concorrencia con subvencións ou axudas doutras administracións públicas ou doutros entes públicos ou privados, non supere o custo da actividade que vai desenvolver o beneficiario.

Terceira: obrigas do beneficiario.

A Fundación Catedral de Santiago, queda obrigada ademais a:

Contratar as empresas especializadas e os medios humanos, técnicos e materiais necesarios para o idóneo desenvolvemento dos traballos, de acordo coa lexislación de subvencións concedidas polo sector público e nomeadamente coa lei 9/2007, de 13 de xuño, de subvenciones de Galicia.

Executar, no prazo de vixencia do convenio, a inversión obxecto deste.

Solicitar á Consellería de Cultura, Lingua e Xuventude da Xunta de Galicia e ao resto das administracións competentes, os informes, as autorizacións e licenzas preceptivas das actuacións, así como de calquera modificación que xurda no seu desenvolvemento.

As entidades beneficiarias consinten expresamente na inclusión dos datos relevantes deste convenio nos rexistros públicos que proceda, de acordo co artigo 16 da Lei de subvencións de Galicia.

En todo o material gráfico e divulgativo que se realice da actuación, engadirase a imaxe institucional da Xunta de Galicia e do resto das partes, como entidades colaboradoras e en especial no cartel no que se dea información das obras.

Contratar e promover a execución das obras conforme ao proxecto de intervención redactado con este obxecto, que deberá contar coa autorización da Dirección Xeral do Patrimonio Cultural, e conforme ás determinacións e cautelas a prol da salvagarda do patrimonio cultural que conteña a Resolución pola que se autorizan as obras.

Xustificar, en tempo e forma, de acordo coa forma indicada no convenio, os gastos realizados ao abeiro do mesmo.

Enviar á Dirección Xeral de Patrimonio Cultural, unha vez finalizada a intervención, a memoria final na que se documente adecuadamente todo o proceso levado a cabo en todas e cada unha das fases do proceso e para todas as disciplinas aplicadas, conforme determina o artigo 43.2 da Lei 5/2016 do patrimonio cultural de Galicia.

A Fundación Catedral de Santiago deberá comunicar á Consellería de Cultura, Lingua e Xuventude a data de inicio e a de recepción das obras, para que a Consellería de Cultura, Lingua e Xuventude poida comprobar a adecuada xustificación da subvención para o efecto do previsto no artigo 30.2 da Lei 9/2007, do 13 de xuño, de subvencións de Galicia.

Como beneficiaria final das obras a S.A.M.I. Catedral de Santiago de Compostela, representada polo Cabido Catedralicio, deberá realizar un acto expreso de aceptación das mesmas que se formalizará mediante a sinatura dunha acta de aceptación da súa entrega, tendo en conta as condicións de execución das obras, así como o seu destino final aos usos culturais e de culto previstos no presente convenio. As actuacións necesarias para o cumprimento deste requisito correrán a cargo da Fundación Catedral, incluíndo a xustificación formal do emprego dos fondos de conformidade coa Lei 9/2007, do 13 de xuño, de subvencións de Galicia.

Cuarta: comisión paritaria de seguimento.

Noméase unha comisión mixta de seguimento e control integrada por dous membros da consellería de Cultura, Lingua e Xuventude e dous membros da Fundación Catedral de Santiago. Esta comisión será a encargada de solucionar as controversias que se poidan suscitar na interpretación do convenio.

Quinta: xustificación dos investimentos.

Gastos subvencionables: considéranse subvencionables os gastos especificados no artigo 29 da Lei de Subvencións de Galicia, que respondan de xeito indubidable á natureza da actividade subvencionada e se realicen no período de vixencia do convenio. Consideraranse subvencionables os gastos que respondan de xeito indubidable á natureza da actividade subvencionada dende o 1 de xaneiro do 2024 ata a data límite de vixencia do convenio.

Os tributos son gasto subvencionable cando o beneficiario da subvención os aboa efectivamente. En ningún caso se consideran gastos subvencionables os impostos indirectos cando sexan susceptibles de recuperación ou compensación, nin os impostos persoais sobre a renda.

De acordo co artigo 29.2 da Lei de subvencións de Galicia, considerarase gasto realizado o que foi efectivamente pagado con anterioridade á finalización do período de vixencia do convenio.

Para a percepción das axudas concedidas será necesario presentar ante a Dirección Xeral de Patrimonio Cultural, orixinal ou copia compulsada da documentación que a seguir se relaciona.

Documentación que ten que presentar o beneficiario:

Memoria da actuación, xustificativa do cumprimento das condicións impostas neste acordo, coa indicación das actividades realizadas e dos resultados obtidos.

Memoria económica xustificativa do custo das actividades realizadas, asinada polo órgano competente da entidade beneficiaria, que conterà:

Unha certificación de obra asinada pola dirección facultativa das obras e a empresa adxudicataria, na que figure a conformidade da entidade beneficiaria, e no seu caso unha relación clasificada de gastos e investimentos, segundo o modelo que se xunta como anexo I.

Os tres orzamentos que, en aplicación do artigo 29.3 da Lei 9/2007, de 13 de xuño, de Subvencións de Galicia, teña solicitado o beneficiario.

As facturas ou os documentos de valor probatorio equivalente no tráfico xurídico mercantil ou con eficacia administrativa.

Extractos ou certificacións bancarias acreditativos do pagamento, por medios bancarios, das facturas que forman parte da conta xustificativa. No suposto de que o xustificante de pagamento inclúa varias facturas, deberán xuntar unha relación delas.

Declaración responsable expedida polo órgano competente da entidade beneficiaria, comprensiva das axudas percibidas ou solicitadas para este proxecto, na que se indique a entidade que a concede, a data e o importe total concedido, segundo o modelo que se xunta como anexo II.

Declaración responsable de titularidade da conta bancaria (anexo III).

Declaración responsable do órgano competente da entidade beneficiaria, de estar ao día no cumprimento das obrigas tributarias ou fronte á Seguridade Social e de non ter pendente de pagamento ningunha outra débeda coa Administración pública da Comunidade Autónoma (anexo IV).

O prazo máximo para a presentación da documentación xustificativa será ata o 30 de novembro de 2024.

Pagamento da subvención: realizarase logo de comprobar a xustificación presentada e a realización do proxecto para o cal se concedeu. O pagamento realizarase pola parte proporcional da contía da subvención efectivamente xustificada.

Pagamentos a conta: a Consellería de Cultura, Educación e Universidade poderá realizar pagamentos a conta que responderán ao ritmo de execución das obras subvencionadas. O importe do pagamento a conta calcularase en aplicación da porcentaxe que supón a súa achega, sen que se poida superar a contía máxima prevista. A contía restante, aboarase cando se xustifique a porcentaxe de obra realizado que equivale á totalidade do importe aportado, segundo o establecido no parágrafo anterior

A Fundación Catedral de Santiago deberá presentar igualmente cando remate a totalidade da obra, a documentación xustificativa da realización da totalidade da obra. O pago do importe total da contía prevista non será considerado pago a conta.

Os pagamentos a conta que realice a Consellería de Cultura, Lingua e Xuventude non poderán superar o 80% do importe total subvencionado, debéndose reservar o 20%

restante para a derradeira xustificación a aportar xunto coa documentación correspondente á finalización da porcentaxe de obra correspondente.

Sexta: Facultades da Consellería de Cultura, Lingua e Xuventude.

A Consellería de Cultura, Lingua e Xuventude, a través dos seus servizos técnicos, resérvase a facultade de realizar as inspeccións e as comprobacións que considere necesarias co fin de asegurar o cumprimento das normas e requisitos cos que se concede esta axuda.

A Consellería de Cultura, Lingua e Xuventude non asume máis obriga que a de transferir as cantidades previstas na cláusula segunda do presente convenio.

O asinamento deste convenio non implica relación contractual de ningún tipo entre as persoas que vaian desenvolver as actividades previstas e mais a Xunta de Galicia, de tal xeito que a esta non se lle pode esixir responsabilidade ningunha nin directa, nin indirecta, nin subsidiaria polos actos ou feitos acaecidos no desenvolvemento do convenio.

Sétima: Período de vixencia.

O presente convenio entrará en vigor o día da súa sinatura e estará vixente ata o 31 de decembro de 2024.

Previo informe favorable da Comisión de Seguimento poderán propoñerse e solicitarse prórrogas do período de vixencia deste convenio debéndose tramitar a oportuna addenda ao mesmo.

En base ao disposto no artigo 31.4 da Lei 14/2013, do 26 de decembro, de racionalización do sector público autonómico, os convenios subscritos pola Administración xeral da Comunidade Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sustentabilidade financeira. As ditas modificacións terán por obxecto a redución do volume das obrigas ou a ampliación do seu prazo de execución.

Admitiranse xustificacións de pagos realizados desde o 1 de xaneiro de 2024.

Poderanse presentar xustificacións de pagos realizados ao longo do ano.

Oitava: Notificación electrónica.

Segundo o artigo 14,2 da Lei 39/2015, do 1 de outubro, do procedemento administrativo común das Administracións Públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigados a relacionarse electronicamente coa Administración e, os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notifica, <https://notifica.xunta.gal>. Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

Novena: Outras obrigas do beneficiario.

A Fundación Catedral de Santiago queda obrigada a:

- a) Non alterar o destino da achega.
- b) Realizar a correspondente execución segundo os documentos técnicos do **proxecto de cuarta fase da restauración Capela do Cristo de Burgos**, autorizado pola Dirección Xeral de Patrimonio Cultural e as condicións que poidan figurar na devandita autorización.
- c) Admitir as inspeccións e os controis que establezan os servizos técnicos da Consellería de Cultura, Lingua e Xuventude.
- d) Efectuar a xustificación de gasto na forma preceptuada neste convenio.
- e) Prestar colaboración e facilitar canta documentación lle sexa requirida no exercicio das funcións de control que lle corresponden á Intervención Xeral da Comunidade Autónoma, ao Consello de Contas e ao Tribunal de Cuentas.
- f) O beneficiario deberá dar cumprimento aos deberes de publicidade que se establecen no artigo 18 da Lei 38/2003, de 17 de novembro, xeral de subvencións, modificado polo artigo 30 da Lei estatal 15/2014, de 16 de setembro, de racionalización do sector público e outras medidas de reforma administrativa.

Décima: Subcontratación e reintegro.

A Fundación Catedral poderá subcontratar a totalidade, e dicir, o 100% da actividade subvencionada. En ningún caso poderán subcontratarse actividades que, aumentando o custo da actividade subvencionada, non acheguen valor engadido ao seu contido.

Considérase subcontratación a concertación total ou parcial da actividade que constitúe o obxecto da subvención. Quedan fóra deste concepto os gastos nos que ten que incurrir a entidade para a realización de seu da actividade subvencionada.

En todo o non previsto expresamente nesta cláusula para a subcontratación, estarase ao disposto no artigo 27 da Lei de subvencións de Galicia e no artigo 43 do seu regulamento.

Procederá o reintegro parcial ou total da subvención nos casos previstos no artigo 33 da Lei de subvencións de Galicia.

Décimo primeira: Réxime xurídico.

En todo o non previsto no presente convenio será de aplicación a Lei 9/2007, do 13 de xuño, de subvencións de Galicia e a súa normativa de desenvolvemento. Aplicarase con carácter supletorio a Lei 38/2003, do 17 de novembro, xeral de subvencións.

As cuestións litixiosas xurdidas da aplicación do presente convenio, e non solucionadas en vía administrativa, serán resoltas pola xurisdición contencioso-administrativa.

Décimo segunda: Publicidade do convenio.

Será de aplicación no relativo á publicidade e rexistro do convenio o disposto na Lei 1/2016, de 18 de xaneiro, de transparencia e bo goberno, así como na disposición adicional do Decreto 132/2006, de 27 de xullo, pola que se regulan os rexistros públicos creados nos artigos 44 e 45 da Lei 7/2005, de 29 de decembro, de orzamentos xerais da Comunidade Autónoma de Galicia para o ano 2006.

Asemade procederase á inscrición do convenio no Rexistro de Convenios, de conformidade co establecido no artigo 5 do Decreto 126/2006, de 20 de xullo, polo que se regula o Rexistro de Convenios da Xunta de Galicia e comunicarse á Base de datos Nacional de Subvencións en cumprimento do disposto nos artigos 18 y 20 da Lei 38/2003, de 17 de novembro, xeral de subvencións.

Décimo terceira: Rescisión do acordo.

O presente convenio resolverase por incumprimento total ou parcial dalgunha das cláusulas que o regulan.

E en proba de conformidade cos termos do presente convenio, as partes comparecentes asínano e rubrícano por cuadruplicado no lugar e na data expresados.

Pola Consellería de Cultura, Lingua e
Xuventude

Pola Fundación Catedral de Santiago

José López Campos

Daniel Carlos Lorenzo Santos

Polo Cabido Catedralicio

José Fernández Lago

ANEXO I

MEMORIA ECONÓMICA DO CUSTO DAS ACTUACIÓNS

Don/
Dña _____ con
DNI _____, en nome e representación da
entidade _____
_____, con CIF _____

DECLARA

Que os gastos que de seguido se relacionan, teñen relación directa co convenio de
colaboración asinado coa Consellería de Cultura, Lingua e Xuventude para

Acredor	Nº fra.	Data fra.	Importe	Data pago
Suma dos investimentos				

Lugar e data

Sinatura

ANEXO II

DECLARACIÓN EXPRESA DAS AXUDAS SOLICITADAS E CONCEDIDAS PARA AS MESMAS ACTUACIÓNS E DECLARACIÓN DE NON ATOPARSE INCURSO/A EN NINGUNHA DAS PROHIBICIÓNS PARA OBTENIR A CONDICIÓ DE BENEFICIARIO DE AXUDAS.

Don/
Dona _____ con
DNI _____, en nome e representación da
entidade _____, con
CIF _____

DECLARA BAIXO A SÚA RESPONSABILIDADE:

Que para a seguinte actuación _____,
a devandita entidade solicitou ou obtivo as axudas e ingresos que se relacionan a continuación:

AXUDAS/INGRESOS CONCEDIDOS

Organismos	Ano	Importe (€)	Disposición reguladora

AXUDAS/INGRESOS SOLICITADOS

Organismos	Ano	Importe (€)	Disposición reguladora

Así mesmo, a entidade comprométese a comunicar inmediatamente cantas axudas solicite ou obteña, para as mesmas actuacións, doutras administracións públicas ou doutros entes públicos ou privados, nacionais ou internacionais, a partir da data desta declaración.

B) Que non se atopa incursión/a en ningunha das prohibicións para obter a condición de beneficiario recollidas no artigo 10.2 da Lei 9/2007, do 13 de xuño, de subvencións de Galicia.

E para que así conste ante a Consellería de Cultura, Lingua e Xuventude, asina esta declaración no lugar e na data abaixo indicados.

_____, ____, de _____ de 2024.

ANEXO III

DECLARACIÓN DE TITULARIDADE DE CONTA BANCARIA

Don/

Dña _____, con

DNI _____, en nome e representación da

entidade _____

_, con CIF _____

DECLARA BAIXO A SÚA RESPONSABILIDADE:

Que a entidade á cal represento é titular da conta corrente que de seguido se indica, para os efectos da percepción da subvención derivada da sinatura deste convenio de colaboración.

IBAN (2 díxitos)

Entidade: (4 díxitos)

Sucursal: (4 díxitos)

Díxito de control: (2 díxitos)

Núm. de conta: (10 díxitos)

(Lugar e data)

(Sinatura)

ANEXO IV

Don/Dña _____, con
DNI _____, en nome e representación da
entidade _____, con CIF _____

DECLARA BAIXO A SÚA RESPONSABILIDADE

Que se atopa ao día no cumprimento das obrigas tributarias e fronte á Seguridade Social e que non ten pendente de pagamento ningunha outra débeda coa Administración pública da Comunidade Autónoma.

Que non ten pendente ningunha obriga por reintegro de subvencións.

(Lugar e data)

(Sinatura)